

四庫全書

史部

欽定四庫全書

史部

會稽志卷十四

詳校官監察御史臣沈孫璉

檢討臣德生覆勘

總校官知縣臣楊懋珩

校對官中書臣李 榮

謄錄監生臣馬紹基

欽定四庫全書

會稽志卷十四

宋施宿等撰

人物

會稽自漢魏晉唐衣冠人物最盛五代之亂錢氏有國
私置丞相以下官惟此邦人士耻之多自抑退無為其
國顯仕者至宋興始相繼而起今取漢以來公卿大夫
略掇其事于篇其訪求朱脩者尚俟他日

漢鄭吉會稽人以從軍為郎吉為人彊執習外國事宣

帝時吉以侍郎田渠黎積穀因發諸國兵攻破車師
遷衛司馬使護鄯善以西南道神爵中匈奴乖亂日
逐王先賢揮欲降漢使人與吉相聞吉發渠黎龜茲
諸國五萬人迎日逐王口萬二千人小王將十二人
隨吉詣京師漢封日逐王為歸德侯吉既破車師降
日逐威震西域遂并護車師以西北道故號都護都
護之置自吉始焉上嘉其功效迺下詔封吉為安遠
侯食邑千戶吉於是中西域而立莫府治烏壘城漢

之號令班西域矣始自張騫而成于鄭吉語在西域傳

嚴光字子陵一名遵會稽餘姚人少有高名與光武同遊學及光武即位光乃變名姓隱身不見帝思其賢乃令以物色訪之後齊國上言有一男子披羊裘釣澤中帝疑其光乃備安車玄纁遣使聘之三反而後至車駕即日幸其館光卧不起帝即其卧所撫光腹曰咄咄子陵不可相助為理耶光眠不應良久乃張

目熟視曰昔唐堯著德巢父洗耳士故有志何至相迫乎帝曰子陵我竟不能下汝耶于是升輿嘆息而去復引光入論道舊故相對累日帝從容問光曰朕何如昔時對曰陛下差增于往因共偃卧光以足加帝腹上明日太史奏客星犯帝座甚急帝笑曰朕故人嚴子陵共卧耳除為諫議大夫不屈乃畊于富春

山後人名其釣處為嚴子陵瀨焉

嚴當作莊

賀純字仲貞會稽山陰人少為諸生博極羣藝十辟公

府三舉賢良方正五徵皆不就復徵拜議郎數陳災異上便宜數百事多見省納遷江夏太守永和中李固上疏曰陛下初登大位聘會稽賀純策書嗟嘆待以大夫之位是以巖穴幽人智術之士彈冠振衣樂欲為用四海欣然歸服聖德

鍾離意字子阿會稽山陰人舉孝廉辟大司徒府徵為尚書時交趾太守張恢坐臧千金詔班賜羣臣意得珠璣而不拜賜帝問其故對曰此臧穢之寶誠不敢

拜帝嗟嘆曰清乎尚書之言乃更以庫錢賜意轉尚書僕射車駕數幸廣成苑意以為從禽廢政當車陳諫天子即時還宮永平中大旱大起北宮意詣闕免冠上疏帝性褊察好以耳目隱發為明朝廷爭為嚴切以避誅責惟意獨敢諫爭數封還詔書臣下過失輒救解之出為魯相以愛利為化

王充字仲任會稽上虞人少孤鄉里稱孝後受業太學師事扶風班彪好博覽而不守章句家貧無書嘗游

洛陽市肆閭所賣書輒能誦憶遂博通衆流百家之言後歸鄉里屏居教授仕郡為功曹以數諫爭不合去乃閉門潛思絕慶弔之禮著論衡八十五篇二十餘萬言蔡邕入吳始得之恒祕以為談助王朗為會稽守又得其書許下稱其才雋或曰不見異人當得異書又時嫌蔡邕得異書或搜求帳中果得論衡抱數卷去邕丁寧曰惟我與爾共之

孟嘗字伯周會稽上虞人其先三世為郡吏並伏節死

難嘗少修操行仕郡為戶曹史有寡婦至孝養姑姑壽終夫女弟先懷嫌忌乃誣婦鳩其母嘗言其枉狀太守不為理嘗謝病去婦竟冤死自是郡中連旱二年後太守殷丹問故嘗曰昔東海孝婦感天致旱于公一言甘澤時降宜戮訟者以謝冤魂丹從之即刑女而祭婦墓天應澍雨後策孝廉遷合浦太守郡海出珠宰守採求不知紀極珠漸徙交趾郡界于是行旅不至嘗革易前敝去珠復還被徵吏民扳車請之

得進乃夜遁去隱處窮澤士民慕其德就居止者百餘家桓帝時尚書同郡楊喬上書薦嘗安仁弘義耽樂道德清行出俗能幹絕羣而嘗單身謝病躬畊壟次匿景藏采不揚華藻沉淪草莽好爵莫及廊廟之寶棄于溝渠竟不見用卒于家

魏朗字少英會稽上虞人為兄報仇亡命陳國從博士卻仲信學春秋圖緯又詣京師長者李膺之徒爭從之初辟司徒府遷彭城令時中官子弟為國相多行

非法朗與更相奏幸臣忿疾欲中之會九真賊起乃
共薦朗為九真都尉到官獎厲吏兵討破羣賊斬首
二千級桓帝美其功徵拜議郎遷尚書屢陳便宜有
所補益出為河內太守政稱三河表會被黨議免朗
性矜嚴閉門整法度家人不見墮容以黨事急徵自
殺著書數篇號魏子

黃昌字聖真會稽餘姚人本出孤微居近學宮數見諸
生脩庠序之禮遂就經學又曉習文法仕郡為決曹

刺史行部見昌甚奇之辟從事後拜宛令政尚嚴猛
好發姦伏皆稱神明遷蜀太守訟者七百餘人悉為
斷理宿惡大奸皆奔走他境後補大司農左轉太中
大夫

鄭弘字巨君會稽山陰人弘少為鄉嗇夫太守第五倫
奇之召署督郵舉孝廉弘師同郡河東太守焦贛楚
王英謀反發覺引貺貺被收道亡妻子繫詔獄諸生
故人皆變姓名以逃其禍弘獨髡頭負鉢鎖詣闕上

章為貺訟罪顯宗赦其家弘躬送貺喪及妻子還鄉里拜駙令累遷尚書令弘前後所陳有補益王政者皆著之南宮以為故事出為平原相徵拜侍中遷大司農為太尉奏尚書張林阿附侍中竇憲而素行臧穢又上洛陽令楊光憲之賓客在官貪殘並不宜處位憲奏弘大臣漏泄密事帝詰讓弘收上印綬弘自詣廷尉詔勅出之乞骸骨歸未許病篤上書陳謝并言竇憲之短帝省章遣醫占弘病臨沒悉還賜物赦

妻子褐巾布衣素棺殯殮以還鄉里

朱雋字公偉會稽上虞人以孝養致名鄉里敬之舉孝
廉除蘭陵令政有異能平交趾賊封都亭侯討潁川汝
南陳國黃巾賊悉破平之遣使持節拜右車騎將軍
振旅還京師為光祿大夫封錢塘侯關東兵起董卓
議移都雋輒止卓卓雖憚之然貪其名重乃表雋太
僕以自副雋被召不肯受遷因進曰國不宜遷必孤
天下望成山東之讜臣不見其可也有司詰曰召君

受遷而君拒之不問徙事而君陳之何也雋曰副相國非臣所堪也遷都非計臣之所急也辭所不堪進臣所急臣之所宜也有司曰遷都之事初無此計也就有未露何所受聞雋曰相國董卓為臣說之臣聞之于相國有司不能屈朝廷稱服焉後為太尉李傕郭汜相攻劫質天子公卿雋性剛即發病而卒

盛憲字孝章會稽人舉孝廉補尚書郎稍遷吳郡太守以疾去官孫策平定吳會誅其英豪憲素有高名策

深忌之初憲與少府孔融善融憂其不免禍乃與曹
公書曰歲月不居時節如流五十之年忽焉已至公
為始滿融又過二海內知識零落殆盡惟會稽盛孝
章尚存其人困于孫氏妻孥湮沒單子獨立孤危愁
苦若使憂能傷人此子不得復永年矣春秋傳曰諸
侯有相滅亡者桓公不能救則桓公耻之今孝章實
丈夫之雄也天下譚士依以揚聲而身不免于幽執
命不期于旦夕是吾祖不當復論損益之友而朱穆

所以絕交也公誠能馳一介之使加咫尺之書則孝章可致友道可宏矣今之少年喜謗前輩或能譏平

皮柄友

孝章孝章要為有天下大名九牧之民所共稱

嘆燕君市駿馬之骨非欲以騁道里乃當以招絕足也惟公匡復漢室宗社將絕又能正之正之之術實須得賢珠玉無脛而自至者以人好之也況賢者之有足乎昭王築臺以尊郭隗隗雖小才而逢大遇竟能發明主之至心故樂毅自魏往劇辛自趙往鄒衍

自齊往嚮使郭隗倒懸而王不解臨溺而王不拯則
士亦將高翔遠引莫有北首燕路者矣凡所稱引自
公所知而復有云者欲公崇篤斯義也因表不悉由
是徵為騎都尉制命未至為策所害

吳賀齊字公苗會稽山陰人守剡長縣吏斯從輕俠為
姦齊立斬之後太末豐浦民反轉守太末長誅惡養
善期月盡平領都尉事齊按兵建安立都尉府發屬
縣兵受齊節度斬賊帥洪明等凡六千級名帥盡禽

拜平東校尉遷威武中郎將討黠歙賊有功為新都
郡太守加偏將軍吳郡餘杭賊起齊討破之豫章東
部賊起衆萬餘人齊誅其首惡遷奮武將軍從權征
合肥權為張遼掩擊幾至危殆齊率兵迎權涕泣言
曰今日之事幾至禍敗願以此為終身戒權自前收
其泪曰大慙謹以刻心非但書諸紳也鄱陽尤突受
曹公印綬為賊陵陽始安涇縣皆應齊與陸遜討破
降之封山陰侯累遷後將軍假節領徐州牧

丁覽字孝連山陰人清身立行用意不苟推財從弟以義讓稱仕郡至功曹守始平長為人精微潔淨門無雜賓孫權深貴待之未及擢用會病卒甚見痛惜殊其門戶覽子固字子賤在襁褓中闕澤見而異之曰此兒後必至公輔固少喪父獨與母居家貧守約色養致敬族弟孤弱與同寒溫虞翻與固同僚書曰丁子賤塞淵好德堂構克舉令德之後惟此君嘉耳歷顯位孫皓即位遷司徒皓悖虐固與陸凱孟宗同心

憂國年七十六卒

朱育山陰人少好奇字凡所特達依體像類造作異字
千名以上仕郡門下書佐與太守濮陽興問對行于
世育後仕朝常在臺閣為東觀令遙拜清河太守加
位侍中推刺占射文藝多通

虞汜字世洪翻第四子生南海父卒還鄉里永安初為
散騎中常侍孫綝廢幼主迎立琅琊王休休未至綝
欲入宮圖為不軌召百官會議皆惶怖失色唯唯汜

對曰明公為國伊周處將相之任擅廢立之威將上
安宗廟下惠百姓大小踴躍自以伊霍復見今迎王
未至而欲入宮如是羣下搖動衆聽疑惑非所以永
終忠孝揚名後世也絀不懌竟立休以討扶嚴功拜
交州刺史冠軍將軍餘姚侯

虞忠字四方翻第五子貞固幹事好議人物造吳郡陸
機于童齒之年稱上虞魏遷于無名之初終皆遠致
為著聞之士交同縣王岐于孤宦之族仕進先至宜

都太守忠乃代之晉征吳忠與夷道監陸晏晏弟中
夏督景堅守不下城潰被害

鍾離牧字子幹會稽山陰人漢魯相意七世孫少與同
郡謝贊吳郡顧譚齊名爰居永興躬自墾田稻熟縣
民有識認之牧遂以與民縣長聞之召民繫獄牧為
之請長曰君慕承宮自行義事僕為民主何得寢公
憲而從君耶牧曰今以少稻而殺此民何心復留裝
還山陰長為釋之民慙懼率妻子春稻得米送還牧

牧閉門不受輸至道旁莫有取者從郎中補太子輔
義都尉遷南海太守後以前將軍假節領武陵太守
卒官家無餘財士民思之始興太守羊銜與太常滕
膺書曰鍾離子幹五晉知之不熟近見其在南海威恩
部伍智勇分明加操行清純有古人之風其見貴如
此

晉賀循字彥先會稽人父邵字興伯孫皓時仕至中書
令領太子太傅皓克暴驕矜政事日敝邵上疏諫皓

深恨之邵奉公貞正親近所憚乃共譖邵後竟見殺
循于家禍流放海濱吳平乃還鄉里節操高嚴童叟
不羣言行舉動必以禮讓好學博聞尤善三禮舉秀
才除陽羨武康令顧榮陸機陸雲表薦循久之召為
太子舍人除吳國內史不就元皇帝為晉王以循為
中書令固讓不受轉太常領太子太傅時朝廷初
建動有疑議宗廟制度皆循所定朝野諮詢為一時
儒宗諸所著論並傳于世

孔愉字敬康會稽山陰人與同郡張茂偉康丁潭世康
齊名時人號曰會稽三康建興初召為丞相掾仍參
丞相軍事以討華軼功封餘不亭侯元帝為晉王使
長兼中書郎于時刁協劉隗用事王導頗見疎遠愉
陳導忠賢有佐命之勲由是不合旨出為司徒左長
史累遷侍中太常蘇峻反愉朝服守宗廟峻平愉往
石頭詣溫嶠嶠執手流涕曰天下喪亂忠孝道廢能
持古人之節歲寒不凋者惟君一人耳三遷尚書左

僕射後以論議守正為導所銜累乞骸骨不許出為
會稽內史在郡三年乃營山陰湖南侯山下數畝地
為宅草屋數間便棄官居之卒謚曰貞

虞潭字思奧會稽餘姚人翻之孫也清貞有檢操周旋
征討賜爵都亭東鄉侯元帝時為宗正卿以疾告歸
會王含沈充等攻逼京都潭于本縣招合宗人及郡
中大姓共起義兵萬數進赴國難至上虞明帝手詔
潭為冠軍將軍領會稽內史潭即受命義衆雲集遣

前鋒過浙江追躡而自次西陵為後繼會充已擒罷
兵徵拜尚書成帝即位以討充功進爵零陵縣侯蘇
峻反督三吳晉陵宣城義興五郡軍事與郗鑒王舒
協同義舉陶侃假潭節監揚州浙江西軍率衆并勢
東西犄角峻平轉鎮東將軍吳國內史軍荒飢饉潭
出倉米賑救又脩滬瀆以防海抄百姓賴之

丁潭字世康會稽山陰人元帝時為尚書祠部郎琅邪
王褒始受封帝欲引朝賢為其國上卿將用潭以問

賀循循曰郎中令職望清重實宜審授潭清淳貞粹
聖明所簡才實宜之成帝時為散騎常侍蘇峻作亂
帝蒙塵于石頭惟潭及鍾雅劉超等隨從不離帝側
峻誅賜爵永安伯累遷左光祿祭酒康帝即位乞骸
骨詔以光祿還第卒謚曰簡

虞喜字仲寧會稽餘姚人少立操行博學好古郡察孝
廉舉秀才司徒辟公車徵拜博士皆不就邑人賀循
為司空先達貴顯每詣喜信宿忘歸自云不能測也

太寧中以博士徵復下詔徵皆不行太常華桓舉賢
良會國有軍事咸康初內史何充上疏曰臣聞二八
舉而四門穆十亂用而天下安伏見前賢良虞喜天
挺貞素高尚邈世束脩立德皓首不倦加以傍綜廣
採博聞強識高枕柴門怡然自足宜使蒲輪紆衡以
旌殊操詔曰潯陽翟湯會稽虞喜耽學守道操擬古
人往雖徵命而不降屈政道須賢宜納諸廊廟其並
以散騎常侍徵又不起有司議祧廟不能決朝廷遣

使就諮訪焉

虞預字叔寧徵士喜之弟也少好學有文章太守庾琛紀瞻並以為主簿轉功曹史察孝廉不行諸葛恢庾亮等薦預召為行參軍除著作佐郎太興中以寇賊未平上疏論為防之術宜得良將因言壽春無鎮祖逖孤立前有勁敵後無係援宜加獎勵使不顧命累遷散騎常侍領著作以老歸預雅好經史憎疾玄虛其論阮籍裸袒比之伊川被髮所以外裔遍中國過

于衰周之時著晉書會稽典錄等皆行于世詩賦碑
誄論難數十篇

虞驥字思行潭之兄子也機幹不及于潭而素行過之
歷吳興太守金紫光祿大夫王導常謂驥曰孔愉有
公才而無公望丁潭有公望而無公才兼之者其在
卿乎宦未達而喪時人惜之

孔羣字敬休有智局志尚不羈蘇峻入石頭時匡術有
寵于峻羣與從兄愉同行于橫塘遇之愉止與語羣

初不視術術怒欲刃之愉下車抱術曰吾弟發狂卿
為我宥之乃免峻平王導保存術常因衆坐令術勸
羣酒以釋憾羣答曰羣非孔子厄同匡人雖陽和布
氣鷹化為鳩至于識者猶憎其目導有愧色仕至中
丞嘗與親舊書云今年田得七百石秣米不足了麴
藥事

孔坦字君平愉從子也祖冲丹陽太守父侃大司農坦
少方直有雅望善左氏傳解屬文元帝為晉王以坦

為世子文學東宮建補太子舍人遷尚書郎歸會稽
久之除領軍司馬未赴召會王敦反與右衛將軍虞
潭俱在會稽起義而討沈充遷尚書左丞吳興太守
封晉陵男加建威將軍卒贈光祿勳諡曰簡

孔嚴字彭祖少仕州郡歷司徒掾尚書殿中郎殷浩臨
揚州請為別駕遷尚書左丞朝廷崇樹浩以抗擬桓
溫溫深不平浩又引接荒人謀立功于閭外嚴言于
浩曰當今時事艱難可謂百六之運而處任者所至

不同所見各異人口云云無所不至頃來天時人情
良可寒心願深思廉藺屈伸之道平勃相和之義又
觀此日降附之徒人面獸心貪而無親難以義感浩
深納之哀帝時以侯領尚書多所匡益拜吳興太守
善于牧守甚得人和又甄賞才能之士論者美焉

孔汪字德澤愉之子好學有志行孝武帝時位至侍中
時茹千秋以佞媚見幸于會稽王道子汪屢言之于
帝帝不納遷尚書太常卿以不合意求出為假節都

督交廣二州諸軍事征虜將軍平越中郎將廣州刺史甚有政績為嶺表所稱

孔安國字安國愉之子羣從惟安國與汪少厲孤貧之操汪既以直諒稱安國亦以儒素顯孝武帝時甚蒙禮遇仕歷侍中太常再為會稽內史領軍將軍安帝隆安中下詔曰領軍將軍孔安國貞慎清正出納播譽可以本官領東海王師必能導達津梁依仁游藝後歷尚書左右僕射

孔沉字德度有美名何充薦沈于王導曰文思通敏宜
登宰門辟丞相司徒掾琅邪王文學並不就從兄坦
以表遺之辭不受坦曰晏平仲儉祀其先人豚肩不
掩豆猶孤裘數十年卿復何辭于是受而服之是時
沈與魏顗虞球虞存謝奉並為四族之雋沈子厥位
至吳興太守廷尉厥子琳之以草書擅名又為吳興
太守侍中

謝奉字弘道會稽山陰人祖端散騎常侍父鳳丞相主

簿奉歷安南將軍廣州刺史吏部尚書後免官還東
謝安赴桓公司馬出西相遇破岡既當遠別遂停三
日共語安欲慰其失官奉輒引以他端雖信宿中塗
竟不言及此事安深恨在心未盡謂同舟曰謝奉故
是奇士奉弟聘字弘遠歷侍中廷尉卿同郡孔嚴字
彭祖有才學簡文帝嘗曰謝安南清令不如其弟學
義不及孔嚴居然自勝

謝安字安石少有重名初辟司徒府又除著作郎並以

疾辭寓居會稽與王羲之及高陽許詢桑門支遁游處出則漁弋入則言詠屬文無處世意揚州刺史庾冰以安有重名必欲致之不得已赴召月餘告歸復除尚書郎琅邪王友並不起吏部尚書范汪舉安為吏部郎安以書拒絕之有司奏安被召歷年不至禁錮終身遂棲遲東土安弟萬為西中郎將總藩任之重安雖處衡門其名猶出萬之右自幼有公輔之望及萬黜廢安始有仕進志時年已四十餘矣征西大

將軍桓溫請為司馬溫與言生平歡笑竟日既出溫問左右頗嘗見我有如此客否徵拜侍中遷吏部尚書中護軍簡文帝疾篤溫上疏薦安宜受顧命詔安總中書事明帝始親萬幾進安中書驃騎將軍錄尚書事符堅敗以總統功進拜太保安雖受朝寄然東山之志始末不渝每形于言色及鎮新城盡室而行造汎海之裝欲須經畧粗定自江道還東雅志未就而卒

謝玄字幼度與從兄朗俱為叔父安所器重桓溫辟為
掾轉征西將軍苻堅入寇朝廷求文武良將安以玄
應舉郝超嘆曰玄必不負所舉吾嘗見其使才雖履
屐間亦得其任於是徵拜建武將軍監江北諸軍事
大破苻堅遂經畧舊都充青司豫平加玄都督徐充
青司冀幽并七州軍事會翟遼張願反叛玄上疏送
節盡求解所職又以疾辭移鎮東陽轉授散騎常侍
左將軍會稽內史玄即興疾之郡卒葬于始寧初玄

移鎮東陽於道疾篤上疏曰臣以常人忽蒙殊遇由
恩厚忘軀甘死若生冀憑皇威以塵露報恩然後從
亡叔臣安退身東山以道養壽豈謂經畧不振自貽
斯戾是以奉送章節待罪有司先疾既動便至委頓
謹遣兼長史劉濟重奉送節蓋章傳伏願矜其所訴
勿令微臣銜恨泉壤表十餘上寢不報

王羲之字逸少司徒導之從子也少有美譽朝廷公卿
皆愛其才器為右軍將軍會稽內史羲之雅好服食

養性不樂在京師初渡浙江便有終焉之志會稽有佳山水名士多居之謝安未仕時亦居焉孫綽李充許詢支遁等皆以文義冠世並築室東土與羲之同好嘗與同志宴集于會稽山陰之蘭亭羲之自為之序以申其志稱病去郡於父母墓前自誓不仕羲之既去官與東土人民盡山水之遊弋釣為娛又與道士許邁共脩服食採藥石不遠千里徧遊東中諸郡窮諸名山泛滄海嘆曰我卒當以樂死羲之既優游

無事與吏部郎謝萬書曰古之辭世者或被髮佯狂
或污身穢節可謂艱矣今僕坐而獲逸遂其宿心其
為慶幸豈非天賜頃東遊還脩植桑果今盛敷榮率
諸子抱弱孫遊觀其間有一味之甘割而分之以娛
目前雖植德無殊邈猶欲教養子孫以敦厚退讓或
有輕薄庶令舉策數馬彷彿萬石之風君謂此何如
比當與安石東遊山海斥行田視地利順養閒暇衣
食之餘欲與親知時共懽讌雖不能興言高詠銜杯引

滿語田里所行故以為撫掌之資其為得意可勝言
耶嘗依依陸賈班嗣楊王孫之處世甚欲希風數子
老夫志願盡于此也

王徽之字子猷羲之第三子性卓犖不羈為大司馬桓
溫參軍又為車騎桓冲騎兵參軍嘗居山陰夜雪初
霽月色清朗四望皓然獨酌酒詠左思招隱詩忽憶
戴逵時逵在剡便夜乘小舟訪之經宿方至造門不
前而反人問其故徽之曰本乘興而行興盡而返何

必見安道耶後為黃門侍郎棄官東歸

王獻之字子敬少有盛名而高邁不羈雖閒居終日容
止不怠風流為一時之冠工草隸善丹青七八歲時
學書羲之密從後掣其筆不得嘆曰此兒後當復有
大名獻之嘗從山陰道上行語人曰山川自相映發
使人應接不暇若秋冬之際尤難為懷仕至中書令
諡曰憲

宋孫處字季高會稽永興人以字行武帝征孫恩季高

樂從及平建鄴封新蕃縣五等侯盧循之難武帝謂
季高曰此賊行破非卿不能傾其巢窟季高率衆三
千泛海襲番禺拔之循父嘏長史孫建之等輕舟奔
始興季高分遣振武將軍沈田子等討平始興及南
康臨賀始安嶺表諸郡循于左里奔還襲廣州季高
又破走之卒追贈南海太守封侯官縣侯武帝念季
高功表稱所贈未優重贈交州刺史

孔琳之字彥琳山陰人強正有志力桓玄輔政為太尉

以為西閣祭酒玄議欲廢錢用穀帛又議復肉刑琳
議以為宜且依舊玄好人附悅而琳之不能順旨是
以不見知宋永初中為御史中丞奏勅尚書令徐羨
之虧違典憲羨之領揚州刺史弟璩之為其中從事
羨之使解釋琳之琳之不許曰我獨忤宰相政當罪
止一身汝少不應從坐自是百僚震肅莫敢犯禁武
帝甚嘉之行經蘭臺親臨幸焉

虞愿字士恭會稽餘姚人元嘉中為湘東王國常侍及

明帝立以愿儒吏學深兼藩國舊恩意遇甚厚除太常丞遷通直散騎侍郎帝以故宅起湘宮寺極奢侈新安太守巢尚之罷郡還見帝帝曰卿至湘宮寺未朕起此寺是大功德愿在側曰陛下起寺百姓賣兒鬻婦何謂功德帝大怒使人馳曳下殿愿徐去無異容帝好圍棋棋甚拙與第一品王抗對奕抗饒借帝曰皇帝飛棋臣不能斷帝以為信然愿曰堯以此教丹朱非人主所宜好也遷兼中書郎除後軍將軍褚

彥回常詣愿愿不在見其床上積塵成寸有書數表
嘆曰虞君之清至此令人掃地拂床而去

齊虞玩之字茂瑤會稽餘姚人仕宋為烏程令路太后
外親朱仁彌犯罪玩之依法案之太后怨訴孝武坐
免官元徽中為尚書右丞齊高帝鎮東府朝廷致敬
玩之為少府猶躡屐造席高帝取屐親視之訛黑斜
銳羹斷以芒接之帝因咨嗟賜以新屐玩之不受帝
問其故答曰今日之賜恩華俱重但著簪敝席復不

可遺遷黃門郎及帝即位玩之表言便宜多見采納
上表告退許之玩之于人物好臧否孔過王儉恨之
至是東歸儉不出送朝廷無祖餞者中丞劉休與親
知書曰虞公散髮海隅同古人之美而東都之送殊
不霽霽歸家數年卒

虞棕字景豫會稽餘姚人少以孝聞仕宋位黃門郎明
帝誅山陽王休祐至葬日寒雪厚三尺故人無至者
惟棕一人來赴齊武帝時為太子中庶子兼祠部尚

書領右軍明帝立棕稱疾不陪位帝使尚書令王晏
賫廢立事示棕以棕舊人引參佐命棕謂晏曰主上
聖明公卿戮力寧假朽老以匡贊維新乎因慟不自
勝朝議欲糾之僕射徐孝嗣曰此亦古之遺直衆議
乃止

孔過字世遠會稽山陰人好典故學與王儉至交昇明
中為齊臺尚書儀曹郎屢歲闕禮多見信納上謂王
儉曰過真所謂儀曹不忝厥職也儉為宰相過嘗謀

議幄帳每及選用頗失物情儉從容啟上曰臣有孔
過猶陛下之有臣永明中為太子家令卒

孔琇之會稽山陰人有吏能仕為尚書左丞廷尉卿出
為臨海太守明帝輔政防備諸藩致密旨于上佐使
便宜從事以琇之為晉熙王冠軍長史行郢州事欲
令殺晉熙琇之辭不許欲自引決友人陸閑諫之琇
之不從遂不食而死

孔稚圭字德璋會稽山陰人少學涉有美譽齊高帝為

驃騎取為記室參軍與江淹對掌辭筆歷黃門郎御史中丞建武初為南郡太守徵侍中不行留本任雅珪風韻清疎好文詠與外兄張融情趣相得又與琅瑯王思遠廬江何點點弟胤並款交不樂世務居宅甚營山水凭几獨酌傍無別事門庭之內草萊不剪中有蛙鳴或問之雅珪曰我以此當兩部鼓吹王晏常鳴鼓吹候之間羣蛙鳴曰此殊聒人耳雅珪曰我聽鼓吹殆不及此晏甚有愧色

梁孔休源字慶緒會稽山陰人梁臺初建為太學博士
武帝嘗問吏部尚書徐冕求有學藝解朝儀者冕曰
孔休源識見清通詳練故事自晉宋起居注誦略上
口帝亦素聞之即日除尚書儀曹郎遷御史中丞正
色直繩無所回避百寮憚之歷都官尚書金紫光祿
大夫車駕臨幸常以軍國事委之昭明太子薨有勅
夜召休源宴居殿參定謀議立晉安王綱為皇太子
自公卿珥貂插筆奏決于前休源怡然無愧及卒帝

流涕顧謝舉曰休源居職清忠方欲共康政道奄至
殞沒朕甚痛之舉曰此人清介彊直臣亦為陛下惜
謚曰貞子

陳虞荔字山披會稽餘姚人九歲隨從伯闡候太常陸
倕倕問五經十事荔對無遺及長博覽文籍善屬文
梁武帝于城西置士林館用為士林學士遷通直散
騎侍郎兼中書舍人時左右之任多參權軸內外機
務互有帶掌惟荔與顧協泊然靜退但以文交見知

侯景之亂荔率親屬入臺陳文帝時為太子中庶子
領大著作初荔母隨荔入臺卒于臺內尋而城陷情
禮不申由是終身蔬食布衣不聽音樂文帝深器之
常引左右朝夕顧訪荔性沈密凡所獻替莫有見其
際者

虞寄字次安對策高第起家梁宣城王國左常侍大同
中嘗驟雨殿前往往有雜色寶珠寄因上瑞雨頌武
帝謂寄兄荔曰此頌典裁清拔卿之士龍也將如何

擢用寄聞之嘆曰以申擊壤之情爾豈買名求仕者乎乃閉門稱疾侯景之亂寄隨兄荔入臺陳寶應據閩中寄至晉安為寶應所得陳武帝除寄為中書侍郎寶應不遣欲引為僚屬固辭獲免及寶應結留異潛有逆謀寄微知其意每陳逆順之理度不可諫乃為居士服以拒絕之自稱東山虞寄寶應既禽賓客微有交涉皆誅惟寄以先識免文帝勅寄還朝衡陽王出閣用為掌書記帝曰所以屈卿遊藩非止文翰

乃令以師表相事也後除東中郎建安王諮議寄辭疾不堪陪列有疑議就決之

唐虞世南餘姚人受業于吳顧野王十餘年精思不倦父荔卒陳文帝召為建安王法曹時叔寄陷于陳寶應世南雖服除仍衣布飯蔬寄還乃釋布噉肉陳滅與世基入隋俱名重當時議者方晉二陸大業中累至祕書郎十年不徙唐興秦王引為府參軍記室中舍王踐祚拜宏文館學士遷太子右庶子固辭改祕

書監世南抗烈論議持正太宗嘗曰朕與世南商略
古今有一言失未嘗不悵恨其懇誠乃如此帝每稱
其五絕一曰性行二曰忠直三曰博學四曰文詞五
曰書翰致仕授銀青光祿大夫弘文館學士如故卒
年八十一詔陪葬昭陵贈禮部尚書諡曰文懿後帝
為詩一篇述古興亡既而嘆曰鍾子期死伯牙不復
鼓琴朕此詩將何所示敕褚遂良即其靈坐焚之後
數歲夢進讜言若平生翌日下制厚恤其家

賀知章字季真越州永興人性曠夷善譚說與族姑子
陸象先善象先嘗謂人曰季真清譚風流吾一日不
見則鄙吝生矣證聖初擢進士超拔羣類科累遷太
常博士遷禮部侍郎兼集賢院學士一日併謝宰相
源乾曜曰賀公兩命之榮足為光寵玄宗自為贊賜
之遷太子右庶子充侍讀徙工部肅宗為太子知章
遷賓客授秘書監知章晚節尤誕放遨嬉里巷自號
四明狂客及秘書外監天寶初病夢遊帝居數日寤

乃請為道士還鄉里以宅為千秋觀有詔賜鏡湖剡
川一曲既行帝賜詩皇太子百官餞送擢其子僧子
為會稽郡司馬賜緋魚使侍養幼子亦聽為道士卒
年八十六

羅珣越州會稽人寶應初詣闕上書授太常寺太祝曹
王臯領江西荆襄節度使常署幕府累遷副使臯卒
軍亂劫府庫珣取首惡十餘人斬以徇環棘庭中俾
投所劫庫物一日皆滿乃貫餘黨召為奉天令中官

出入係道吏緣以犯禁珣榜笞之雖死不置自是屏
息擢廬州刺史民間病者捨醫藥禱淫祀珣下令止
之修學宮政教簡易有芝草白雀淮南節度使杜祐
上治狀賜金紫服再遷京兆尹請減平糴半以常賦
充之人賴其利以老病求解徙太子賓客累封襄陽
縣男卒諡曰夷

經學

漢趙晁字長君會稽山陰人少嘗為縣吏奉檄迎督郵

畢耻于廝役遂棄車馬去到捷為資中詣杜撫受韓
詩究竟其術積二十年絕問不還家為發喪制服畢
卒業乃歸州召補從事不就舉有道卒于家畢著吳
越春秋詩細歷神淵蔡邕至會稽讀詩細而歎息以為
長於論衡邕還京師傳之學者咸誦習焉

吳虞翻字仲翔會稽餘姚人辟召不就翻聞曹公辟曰
盜跖欲以餘財污良家耶遂拒不受翻與少府孔融
書并示以所著易融答書曰覩吾子之著易乃知東

南之美者非徒會稽之竹箭也張紘又與融書曰虞仲翔前頗為論者所侵美實為質雕琢益光後翻以論議忤孫權遠徙交州雖處罪放而講學不倦門徒常數百人又為老子論語國語訓注皆傳于世

闕澤字德潤會稽山陰人孫權稱尊號以澤為尚書嘉禾中為中書令加侍中赤烏五年拜太子太傅領中書如故每朝廷大議經典所疑輒諮訪之以儒學勤勞封都鄉侯虞翻稱澤曰闕生矯傑蓋蜀之揚雄又

曰闕子儒術德行亦今之仲舒也

徵崇字子和隱于會稽治易春秋左氏傳兼善內術本
姓李遭亂更姓遂躬耕以求其志好尚者從學所教
不過數人輒止欲令其業必有成也

晉楊方字公回會稽人少好學有異才初為郡鈴下威
儀公事之暇輒讀五經內史諸葛恢見而奇之時虞
喜兄弟以儒學立名雅愛方為之延譽恢嘗遣方為
文薦郡功曹主簿虞預美之送示賀循循報曰不圖

偉才如此其文甚有奇分若出胷臆自是一國所推
司徒王導辟為掾轉東安太守在郡積年著五經鈎
深及吳越春秋并雜文皆行于世

謝沈字行思會稽山陰人博學多識綜練經史郡命主
簿功曹察孝廉內史何充引為參軍母老去職不交
人事耕耘之暇研精墳籍康帝即位朝議疑七廟迭
毀徵為太常博士以質疑滯除尚書度支郎何充庾
冰共稱沈乃遷著作郎沈著毛詩漢書外傳及他詩

賦文論其學在虞預之右

梁賀瑒字德璉會稽山陰人齊時舉明經為太學博士
梁天監中初開五館以瑒兼五經博士別詔為皇太
子定禮撰五經義時武帝方創定禮樂瑒所建議多
見施行尋領五經博士所著禮易講疏等數百篇卒
于館

賀琛字國寶伯父瑒授經業尤精三禮年將三十便事
講授初瑒于鄉里受徒四方問業者三千人天監中

亡至是咸復集焉武帝召見補王國侍郎累遷尚書
左丞詔撰新諡法便即施用加員外散騎常侍每進
見帝與語嘗移晷刻省中語曰上殿不下有賀雅琛
容止閑雅故時人呼之後為光祿大夫卒所撰三禮
講疏五經滯義及諸儀注凡百餘篇

孔子祛會稽山陰人少孤好學耕耘樵採常懷書自隨
明古文尚書為兼國子助教遷西省學士助賀琛撰
錄累遷中書通事舍人武帝撰五經講疏及孔子正

言子祛嘗攷閱羣書以為義證又自撰注尚書及尚書義後加散騎侍郎卒于官

虞僧誕會稽餘姚人為國子助教以左氏講授聽者常數百人時博士崔靈恩先習左傳服解不為江東所行乃改說杜義每文句常申服難杜僧誕最精杜學作申杜難服以答靈恩世並傳焉

孔僉會稽山陰人少師事何胤通五經尤明三禮孝經論語生徒數百人三為五經博士太清亂卒于家子

淑玄亦以文學官至太學博士兄子女素善三禮有盛名

孔子雲會稽人師事吳興沈峻峻始為國子助教吏部郎陸儼言于僕射徐勉以為周官一書羣經源本學絕不傳已歷年世惟峻獨精宜即用其人使專此學勉于是奏峻兼五經博士於館講授子雲實傳峻業官亦至五經博士焉

唐孔若思山陰人早孤母躬訓教長以博學聞有遺以

褚遂良書者納一卷焉其人曰是書貴千金何取之
廉答曰審爾此為多矣擢明經歷庫部郎中坐右置
止水一石明止足意中宗初敬暉桓彥範當國以若
思多識古今凡大政事必咨質而後行三遷禮部侍
郎出為衛州刺史累封梁郡公子季詡擢制科終左
補闕

康子元會稽人開元初詔舉能治易老莊者張說以聞
累擢祕書少監兼集賢侍講學士玄宗東之泰山說

引康子元等商裁封禪儀及還徙宗正少卿以疾授
秘書監致仕

文章

晉孫綽字興公家于會稽與兄統皆博學善屬文綽遊
放山水十有餘年乃作遂初賦以致其意又嘗著天
台山賦辭致甚工初成以示友人范榮期曰卿試擲
地當作金石聲也內史王羲之引為右軍長史遷散
騎常侍大司馬桓溫欲經緯中國以河南初平將移

都洛陽朝廷畏溫不敢為異綽乃上疏溫不悅曰致
意興公何不尋君遂初賦知人家國事耶綽少以文
才著稱于時文士綽為其冠溫王郗庾諸公之薨必
須綽為文辭然後刊石焉

宋謝靈運陳郡陽夏人移籍會稽少好學博覽羣書文
章之美與顏延之為江左第一從叔混特加愛襲封
康樂公性豪侈車服鮮麗世共宗之咸稱謝康樂也
累遷秘書丞出為臨海太守郡有名山水靈運素所

愛好遂肆意遊遨徧歷諸縣所至輒為歌詩以致其
意靈運父祖並葬始寧有故宅及墅遂修營舊業傍
山帶江盡幽居之美與隱士王弘之孔淳之等放蕩
為娛有終焉之志每一首詩至都下貴賤莫不競寫
宿昔間士庶皆徧又作山居賦並自註以言其事文
帝徵為祕書監不起命光祿大夫范泰敦獎乃出使
撰晉書粗立條例書竟不就靈運詩書皆兼獨絕每
文竟手自寫之文帝稱為二寶云

謝惠連祖冲父方明三世皆居會稽惠連幼有奇才不
為父方明所知族兄靈運加賞之自言每有篇章對
惠連輒得佳語常于永嘉西堂思詩竟日不就忽夢
惠連即得池塘生春草大以為工及靈運自永嘉還
始寧方明為會稽郡靈運造焉謂方明曰阿連才悟如
此而尊作常兒遇之惠連與東海何長瑜潁川荀雍
太山羊璿之以文學賞會共為山澤之遊靈運登臨
海嶠初發彊中以詩與惠連曰可見羊何共和之也

嘗辟州主簿不就後為司徒彭城王法曹作雪賦以
高麗見奇焉

隋虞綽字士裕會稽餘姚人博學有俊才尤工草隸陳
左衛將軍傅縡有盛名見綽詞賦嘆曰虞郎之文無
以尚也仕陳為太學博士永陽王記室大業初為祕
書學士奉詔撰長洲玉鏡等書十餘部綽所筆削帝
未嘗不稱善累遷著作佐郎與虞世南庾自直蔡允
恭等四人嘗居禁中以文翰待詔從征遼東帝舍臨

海頓見大鳥異之使綽為銘帝覽而善之命有司勒于海上其詞賦並行于世

唐賀德仁越州山陰人與從兄德基皆以文辭稱時人為之語曰學行可師賀德基文質彬彬賀德仁兄弟八人時比漢荀氏始在陳為吳興王友入隋楊素薦其才授豫章王記室高祖起兵為隱太子友遷中舍人以年耆不更吏職徙洗馬為東宮學士貞觀初遷趙王友卒有集二十卷藏于四庫見藝文志

嚴維字正文越州人為秘書郎大厯中與鄭槩裴冕徐
嶷王綱等宴其園宅聯句賦詩世傳浙東唱和維詩
一卷及剡隱居朱放越僧靈澈詩集皆藏秘府先是
神龍中越有賀朝萬齊融與同郡賀知章俱以文詞
揚名上京朝官止山陰尉齊融崑山令惟知章最貴
焉

吳融越州山陰人祖肅有名大中時賜號文簡先生融
學自力富辭調龍紀初及進士第韋昭度討蜀表掌

書記累遷御史歷翰林學士中書舍人昭宗反正御
南闕羣臣稱賀融最先至于時左右歡駭帝有指授
疊十許藁融跪作詔少選而成語當意詳帝咨賞良
厚進戶部侍郎鳳翔劫遷不得從去客閬鄉召還遷
承旨卒

節義

漢戴就字景成會稽上虞人仕郡倉曹掾揚州刺史歐
陽參奏太守成公浮臧罪遣部從事薛安收就于錢

塘獄幽囚考掠五毒慘至就慷慨直辭顏色不變主者窮竭慘酷無復餘方乃卧就覆船下以馬通薰之一夜二日皆謂已死發船視之就方張眼罵曰何不益火而使滅絕主者以白安安呼見就謂曰太守罪穢狼籍受命考實君何故以骨肉拒扞耶就據地答言太守剖符大臣當以死報國卿雖銜命固宜申斷寃毒奈何誣枉忠良強相掠理命臣諉其君子證其父就考死之日當白于天如蒙生全亦手及相裂安

奇其壯節即解械表釋郡事浮徵還京師太守劉寵
舉就孝廉病卒

吳董襲字元代餘姚人長八尺武力過人曹公出濡須
襲從孫權赴之權使襲督五樓船住濡須口夜卒暴
風五樓船傾覆左右散走舸乞使襲出襲怒曰受將
軍任在此備賊何等委去耶敢復言此者斬于是莫
敢干其夜船敗襲死權改服臨殯供給甚厚

邵疇字溫伯會稽人為郡太守郭誕功曹孫皓時誕以

不白妖言被收惶遽無以自明疇進曰疇今自在明府何憂遂詣吏吏上疇辭皓怒猶盛疇慮誕卒不免遂自殺以證之臨亡置辭曰疇生長邊陲不閑教道得以門資廁身本郡踰越儕類位極朝右不能贊揚盛化養之以福今妖訛橫興干國亂紀疇以噂噍之語本非事實雖家誦人詠不足有慮天下重器而匹夫橫議疾其醜聲不忍聞見欲含垢藏疾不彰之翰筆鎮躁歸靜使之自息愚心勤勤每執斯旨故誕屈

其所自默以見從此之為愆實由于疇謹不敢逃死
歸罪有司惟乞天鑒特垂清察吏收疇喪得辭以聞
皓免誕大刑送赴建安作舡疇亡時年四十皓嘉疇
節義詔郡縣圖形廟堂

鍾離徇山陰人父牧徇領兵為將拜偏將軍戍西陵與
監軍使者唐盛論地形勢謂宜城信陵為建平援若
不先城敵將先入盛不然徇計晉果遣將修信陵城
晉軍平吳徇領水軍督臨陣戰死

晉張茂字偉康會稽人少有志行為鄉里所敬信初起義兵討賊陳斌一郡用全元帝辟為掾屬遷太子衛率出補吳興內史沈充反茂與三子並遇害茂弟盜為太守周札將軍充討札盜又死之贈茂太僕

孔祗字承祖車騎將軍愉之弟也太守周札命為功曹史札既為沈充所害故人賓吏莫敢近者祗冒及號哭親行殯禮送喪還義興時人義之

梁王琳字子珩會稽山陰人授都督廣州刺史元帝為

魏國所逼徵琳赴援除湘州刺史師次長沙知魏已
平江陵廼為元帝舉哀三軍縞素大營樓艦以圖義
舉陳武帝受禪琳乃移湘州軍府就郢城帶甲十萬
巡軍而言曰此可為勤王之師矣溫太真何人哉初
魏克江陵永嘉王莊年甫七歲逃匿人家琳迎還湘
中出質于齊請納莊為梁王齊文宣遣兵援送冊拜
琳梁丞相遂奉莊纂梁祚于郢州琳兵東下為陳軍
所敗復與莊同入齊齊孝昭遣琳出合肥鳩合義故

更圖進取淮南僉楚皆願戮力陳將吳明徹寇齊齊遣琳與尉破吳等出援秦州破吳軍敗琳還至彭城齊令徑赴壽陽并許召募明徹進兵圍之城陷被殺哭者聲如雷齊贈琳侍中諡曰忠武

張彪亡命若邪山中臨城公大連出牧東揚州以為中兵參軍侯景將宋子仙攻下東揚州還入若邪山義舉貞陽侯即位以為東揚州刺史陳文帝入會稽彪擊走之沈泰申進等共叛彪敗遂與弟崑崙及妻

楊氏還入若邪山一犬名黃蒼在彪前後陳遣章昭達領兵購之并圖其妻劫來黃蒼便啣一人中喉死彪應犬識之曰卿須我者但可取頭誓不生見陳蒨謂妻楊呼為鄉里曰我不忍令鄉里落他處今當先殺鄉里然後就死楊引頸受刃不辭彪不下刀便相隨下嶺彪謂楊曰從此而訣若見沈泰申進等為語功名未立猶望鬼道相逢劫即殺彪并其弟首致于昭達遂稱文帝教進兵迎楊楊便改啼為笑謂昭達

殯彪既畢黃蒼俯伏冢間號叫不肯離楊還經彪宅
謂昭達曰婦人本在容貌今辛苦日久請暫過宅妝
飾楊入室遂割髮毀面哀哭慟絕誓不更行文帝聞
之嘆息遂許為尼彪起于若邪興于若耶終于若耶
及妻犬皆為時所重異

孝行

晉夏方字文正會稽永興人家遭疫癘父母伯叔羣從
死者十三人方年十四夜則號哭晝則負土十有七

載葬送得畢因廬于墓側種植松柏烏鳥猛獸馴擾
其旁吳時拜仁義都尉累遷五官中郎將吳平除高
山令百姓有罪應加捶撻輒涕泣向之小大莫敢犯
焉

宋賈思會稽諸暨人少有至行母亡居喪過禮未葬為
鄰火所逼思及妻栢氏號哭奔救隣近赴助棺櫬得
免思栢俱見燒死有司奏改其里為孝義里追贈天
水郡顯親都尉

郭世道會稽永興人生而失母父更娶世道事父及後母孝道淳脩年十四又喪父居喪過禮殆不勝哀母亡負土成墳親戚或共賻助微有所受葬畢僱賃還直仁厚之風行于鄉黨莫有呼其名者元嘉中大使散騎常侍袁愉表其淳行勅表門閭改所居獨楓里為孝行焉

郭原平字長泰世道子父抱篤疾彌年原平衣不解帶跨積寒暑及亡哭踊慟絕數日方蘇以為奉終之義

情禮自申乃訪邑中有營墓者助人運力經時展勤
久乃閑練宅窆之事儉而當禮性無術學因心自然
母終毀瘠彌甚僅乃免喪文帝崩原平號慟日食麥
餅一枚如此五日人曰誰非王臣何獨如此原平泣
曰吾家見異先朝蒙褒贊之賞不能報恩私心感動
耳太守蔡興宗臨郡深加嘆異還都表其殊行舉為
太學博士會興宗薨事不行

何子平世居會稽少有志行見稱于鄉里事母至孝竭

身運力以給供養元嘉中除吳郡海虞令縣祿惟以
養母不及妻子人或疑其儉薄子平曰希祿本以養
親不在為已母喪去官哀毀踰禮每至哭踊頓絕方
蘇大明末東土飢荒繼以師旅八年不得營葬晝夜
號哭擗踊不闕俄頃所居屋敗不蔽雨日兄子伯興
採伐茅竹欲為葺治子平不肯曰我情事未申天地
一罪人耳屋何宜覆子平居喪毀甚困瘠踰久及至
免喪支體殆不相屬幼持操檢敦厲名行雖處閭室

如接大賓學義堅明處之以默好退之士以此貴之
齊杜栖字孟山自父京產居會稽日門山中栖善清言
連辟從事書佐為國子學士父老歸養栖肥皙長壯
及京產病旬日間便皮骨自支京產亡水漿不入口
晨夜不罷哭翔望節歲絕而復續嘔血數升何屑謝
朏並移書敦譬戒以毀滅至祥禪夢見其父慟哭而
絕初屑兄點見栖嘆曰卿風韻如此雖獲嘉譽不永
年矣卒時年三十六當時咸嗟惜焉

唐羅讓字景宣以文學蚤有譽舉進士宏辭賢良方正
皆高第為咸陽尉父喪幾毀滅服除布衣糲食不應
辟署十餘年淮南節度使李鄴即所居數請置幕府
除監察御史位給事中累遷福建觀察使兼御史中
丞有仁惠名

丁興會稽人家近荒野野火沿燒興母老病乃濕衣覆
母以身障火身死母全

張萬和會稽諸暨人遭父母喪兄弟廬于墓側二十餘

年有芝草生甘泉出萬和終其子亦廬于墓所唐孝友傳叙曰唐以孝弟名通朝廷者多閭巷刺草之民皆得書于史官諸暨張萬和蕭山李渭許伯會戴恭俞僅皆事親居喪著至行者天子皆旌表門閭賜粟帛州縣存問復租稅有授以官者

許伯會蕭山人玄度十二世孫舉孝廉上元中為衡陽博士遭父喪負土成墳不御絮帛嘗滋味野火將建塋樹悲號于天俄而雨火滅歲旱泉湧廬前靈芝瑞

獸生于墓側

戴恭字玄敬蕭山人少居母喪十年廬于墓側生芝草

嘉禾

俞僅蕭山人一門四代兄弟十五人老幼八十餘口並
經術貞廉僅遭親喪哀毀骨立為鄉里所稱觀察使
孟簡書于圖經以勵風俗

隱遯

魏嵇康字叔夜其先會稽上虞人恬靜寡欲好老莊常

修養性服食之事彈琴詠詩自足于懷著養生論所
與神交者惟陳留阮嗣宗河內山巨源豫其流者河
內向子期沛國劉伯倫嗣宗兄子仲容琅邪王濬沖
遂為竹林之遊世所謂竹林七賢也嘗採藥游山澤
會其得意忽焉忘反山巨源將去選官舉康自代康
乃與書告絕又撰上古以來高士為之傳贊欲友其
人于千載也

晉阮裕字思曠陳留尉氏人居會稽剡縣有肥遯之志

有以問王逸少逸少曰此公近不驚寵辱雖古之沉
冥何以過此劉真長曰我入東正當泊安石渚下耳
不敢復近思曠傍在東山終日靜默無所修綜而物
自宗焉裕孫萬齡少知名家在剡縣頗有素情宋永
初末自侍中解職東歸

謝敷字慶緒會稽人性澄靖寡欲入太平山十餘年辟
命皆不就初月犯少微一名處士星占者以隱士當
之譙國戴安道有美才時人憂之俄而敷死會稽人

士以嘲吳人云吳中高士求死不得死

戴逵字安道譙國人居會稽剡縣性高潔常以禮度自處深以放逵為非孝武帝時以散騎侍郎國子博士累召辭父疾不就郡縣敦逼不已乃逃于吳會稽內史謝幼度慮其遠遁不及乃上疏請絕其召命帝許之逵復還剡後召之復不至

夏統字仲御會稽永興人嘗詣洛市藥會三月上巳王公以下並至浮橋士女車服燭路統在船中曝藥並

不之顧太尉賈充怪而問之徐答曰會稽夏仲御也
充耀以文武鹵簿鼓吹車乘又使妓女匝繞其船統
危坐如故若無所聞充等各散曰此吳兒木人石心
也統歸會稽不知所終

宋孔淳之字彥深魯人居剡性好山水每有所遊必窮
幽峻或旬日忘歸嘗遇沙門釋法崇因留三載與戴
顥王弘之王敬弘等共為方外之游會稽太守謝方
明苦要之不能致使謂曰苟不入吾郡何為入吾郭

淳之笑曰潛遊者不識其水巢栖者不辨其林飛沈
所至何問其主終不肯往茅室蓬戶庭草蕪徑惟床
上有數帙書元嘉初徵為散騎侍郎乃逃于上虞界
中家人莫知所在

戴顓字仲若安道子也會稽剡縣多名山故世居剡下
與兄並受琴于父父沒所傳之聲不忍復奏各造新
弄兄制五部顓制十五部顓又制長弄一部並傳于
世桐廬縣又多名山兄弟復共遊之因留居止兄卒

顯以桐廬僻遠難以養疾乃出居吳下吳下士人共
為築室聚石引水植林開澗少時繁密有若自然乃
述莊周大旨著逍遙論禮記中庸篇元嘉中召不就
又止京口黃鵠山山北竹林精舍宋文帝每欲見之
嘗謂黃門侍郎張敷曰吾東巡之日當宴戴公山下
也

朱百年會稽山陰人少有高情携妻孔氏入會稽南山
以伐樵採箬為業以樵箬置道傍輒為行人所取明

旦已復如此人稍怪之積久方知是朱隱士所賣須
者隨其所堪多少留錢取樵箬而去或遇寒雪樵箬
不售無以自資輒自榜船送妻還孔氏天晴迎之好
飲酒頗言玄理時為詩詠有高勝之言隱迹避人惟
與同縣孔凱友善凱亦嗜酒相得輒酣對盡懽顏竣
為東揚州餉百年米五百斛不受後卒山中蔡興宗
為會稽太守餉百年妻米百斛妻遣婢詣郡門奉辭
固讓時人美之以比梁鴻妻

王弘之字方平家在會稽上虞兄敬弘為左僕射嘗解貂裘與之即著以採藥性好釣上虞江有一處名三石頭弘之嘗垂綸于此經過者不識之或問漁師得魚賣否弘之曰亦自不得得亦不賣日夕載魚入上虞郭經親故門各以一兩頭置門內而去始寧沃川有佳山水弘之又依巖築室謝靈運顏延之並相欽重靈運與廬陵王義真牋曰會稽既豐山水是以江左嘉遁並多居之至若王弘之拂衣歸耕踰歷三紀

孔淳之隱約窮岫自始迄今阮萬齡辭事就閒纂戎
先業既遠同義唐亦激貪厲競若遣一个有以相存
真可謂千載盛美也

孔祐會稽山陰人敬康曾孫也至性通神隱于四明山
嘗見山谷中有數百斛錢視之如瓦石不異采樵者
競取入手即成沙礫曾有鹿中箭來投祐祐為之養
創愈然後去太守王僧虔欲引為主簿不可屈祐子
道徽與杜景齊友善少厲高行能世其家隱居南山

終身不窺都邑齊豫章王嶷為揚州辟西曹書佐不
至鄉里宗慕之道徽兄子總有操行遇饑寒不可得
衣食縣令丘仲孚薦之除竟陵王侍郎竟不至

齊杜京產字景齊吳郡錢塘人少恬靜絕意榮宦頗涉
文義專修黃老會稽孔顗清剛有峻節一見而為款
交與同郡顧歡同契始寧東山開舍授學劉瓛入東
與之游曰杜生當今之臺尚也又于會稽日門山聚
徒教授建武初徵員外散騎侍郎京產曰莊生持釣

豈為白璧所回不就卒

緒伯玉字元璩錢塘人少有隱操年十八父為之昏婦
入前門伯玉從後門出遂往剡居瀑布山性耐寒暑
三十餘年隔絕人物王僧達為吳郡苦禮致之伯玉
不得已停郡信宿纔交數言而退宋孝建二年召聘
不就齊高帝即位手詔吳會二郡以禮迎遣又辭疾
上不欲違其志勅于剡白石山立太平館舍之卒年
八十六伯玉常居一樓上仍築樓所

梁何胤字子季廬江潯人仕齊至中書令賣園宅欲入
東山拜表辭職不待報輒去有詔許之以會稽山多
靈異往遊焉居若邪山雲門寺初胤二兄求點並棲
遁求先卒至是胤又隱世號點為大山胤為小山亦
曰東山世謂何氏三高梁武帝踐祚詔為特進不起
有勅給白衣尚書祿固辭又勅山陰庫錢月給五萬
不受乃勅何子朗孔壽等六人于東山受學胤以若
邪處勢迫隘不容學徒遂遷秦望山山有飛泉迺起

學舍即林成園因巖為堵別有小閣室寢處其中躬
自啟閉僮僕無得至者

唐秦系字公緒越州會稽人北都留守薛兼訓奏為右
衛率府倉曹參軍不就客泉州南安九日山大松百
餘結廬其上穴石為研注老子彌年不出刺史薛播
數往見之歲時致羊酒未嘗至城門張建封聞不可
致請加為校書郎其後東度秣陵既卒南安人思之
號其山為高士峯

張志和字子同婺州金華人居江湖自稱煙波釣徒著書號玄真子亦以自號兄鶴林恐其遁世為築室越州東郭茨以生草椽棟不施斤斧豹席櫟屨每垂釣不設餌志不在魚也觀察使陳少游往見為終日留表其居曰玄真坊以門隘為買地大其閤號回軒卷志和善圖山水擊鼓吹笛舐筆輒成嘗撰漁歌憲宗圖真求其歌不能致李文饒稱志和隱而有名顯而無事不窮不達嚴子陵之比云

孔述睿越州山陰人梁侍中休源八世孫少與兄弟允
符允讓篤孝已孤偕隱嵩山而述睿資嗜學大厯中
劉晏薦于代宗召累擢司勳員外郎史館修撰述睿
每一遷即至朝謝俄而辭疾歸以為常德宗立拜諫
議大夫賜第宅固辭久乃改祕書少監以太子賓客
還鄉

方干字雄飛新定人隱于會稽漁于鏡湖蕭然山水間
以詩自放咸通中太守王龜知其亢直薦之以諫官

召不就而卒門人相與私諡曰玄英先生

貞婦烈女

漢曹娥

見祠廟門

晉虞潭母孫氏

潭山陰人見人物門

潭父忠亡遺孤藐爾孫氏雖

少誓不改節躬自撫養劬勞備至潭始自幼童便訓

以忠義永嘉末潭為南康太守值杜弢叛逆孫氏勉

潭以必死之義又傾貲產以餽戰士潭遂尅捷及蕪

峻亂潭守吳興假節征峻孫氏戒之曰吾聞忠臣出

孝子之門汝當捨生取義勿以吾老為累于時會稽
內史王舒遣子允之為督護孫氏又謂潭曰府君遣
兒征賊汝何獨不潭即以子寵為督護與允之合勢
拜武昌侯太夫人潭立養堂于家王導以下皆拜謁
焉卒諡曰定忠夫人

張茂妻陸氏

茂會稽人
見節義門

茂為吳郡太守為沈充所害陸

氏傾家產率茂部曲為先登以討充充敗陸誌闕為
茂謝不尅之責詔曰茂夫妻忠誠舉門義烈遂追贈

茂太僕

王凝之妻謝氏字道韞聰識有才辯凝之為會稽內史
孫恩之亂凝之及諸子已被害道韞命婢肩輿抽刃
出門亂兵稍至手殺數人乃被虜外孫劉濤時年數
歲賊又欲害之道韞曰事在王門何關他族必其如
此寧先見殺恩雖毒虐為之改容乃不害濤自爾廢
居會稽家中莫不嚴肅

孫晷妻虞氏初徵士虞喜

喜餘姚人見人物門

隱居海濱有高世

之風晷欽其德名聞喜弟預有女遂聘焉女棄華尚
素與晷同志時人號為梁鴻夫婦

宋吳翼之母丁氏

翼之永興人

少喪夫不再行年荒分食以


貽餓者同里左僑家露四喪無以葬丁為辦冢槨以
仁愛著稱長婦王氏既寡亦執志不嫁州郡上言詔
表門閭

齊屠氏女居諸暨東沔里父失明母痼疾女晝樵採夜
紡績以供養父母俱卒負土成墳鄉里多欲娶之女

以無兄弟誓守墳墓不嫁

梁張彪妻

見節義門



會稽志卷十四